

Uunga siunnersuut:**Kalaallit qimmiinik qimuttunik qimmeqarneq illersuinerlu pillugit Inatsisartut
Inatsisissaattut siunnersuut****Kapitali 1***Atuuffissaa isumasiuutillu*

§ 1. Inatsisartut inatsisaanni uani kalaallit qimmiinut qimuttunut qimminik qimuttoqarfinniittunut qimuttoqarfinniingitsunullu tamanut tunngasut ilaatinneqarput, qimmit qimuttut inuussutissarsiutigalugu imaluunniit inuussutissarsiutiginagu qimmiutigineqaraluarpataluunniit. Inatsisartut inatsisaata aamma qimmit allat qimuttuunngitsut qimuttoqarfinnut immikkut akuersissuteqarnikkut eqqunneqarsimasunut malittarisassanik ilaqarpoq, tak. § 3, imm. 3.

§ 2. Uani Inatsisartut inatsisaanni uku ima paasineqassapput:

- 1) Qimuttunik qimmeqarfik: Kujataani avannarpasissutsip 66-ip avannaani aamma kippasissutsip 44-p kangiani sumiiffik, tassunga ilanngullugu Nuna Allannagutsaaliugaq, taamaattorli Kommune Kujalliup avannamut kangimut killeqarfiata kangiani.
- 2) Qimmeq qimuttoq: Qimmeq kalaallit qimmiat qimuttoq.

Kapitali 2*Qimuttunik qimmeqarfik*

§ 3. Qimmit qimuttut taamaallaat Kalaallit Nunaanni qimminik qimuttoqarfinniissinnaapput.

Imm. 2. Qimminik qimuttoqarfiusunut qimminik qimuttuunngitsunik eqqussinissaq peqarnissarlu sunaluunniit inerteqqutaavoq, taamaattoq imm. 3 takuuk.

Imm. 3. Imm. 2-mi aalajangersakkat apeqqutaatinnagit qimmit innarluutilinnit atorneqartartut uppersaateqarlutik innarluutillit ikiortaat qimuttoqarfinniittut qinnuteqaateqartoqarneratigut Uumasut nakorsaqaarnikkut oqartussaaffiup akuersinnaavai. Tamanna aamma atuuppoq oqartussat sulinerminnut atatillugu qimmiminnik nassartariaqaleraangata imaluunniit qimuttoqarfinni ajutoortoqartillugu kiisalu sungiusartoqartillugu. Sungiusarniartoqartillugu tamatuma pinnginnerani siusinaarluni tamatumunnga qinnuteqartoqassaaq.

Imm. 4. Imm. 3-mi akuersissummi piunasaqaateqartoqarsinnaavoq, matumani ilaallutik allanit immikkoortinneri, piaqqisinnaajunnaartinneri, akiuussuserneqarneri, miluuffigisaminnit ilanngartuisunit akiuussuserneqarneri, nalunaarsorneqarneri aamma ID-mik nalunaaqutserneri. Akuersissummi sulinermi qimmit kiisalu qimmit sullissinnermi

atorneqartartut sumi angalasinnaanerat pillugu atungassarititanik aalajangersaasoqarsinnaavoq.

Imm. 5. Qimmit qimuttut qimuttoqarfimmiit anninneqarsimasut eqquteqqeqqusaanngillat, inatsisit malillugit aqqusaaginnanngikkunik, tak. § 4, imm. 5.

Imm. 6. Qimmit qimuttut qimuttunik qimmeqarfimmeersut unioqqutitsillutik Kalaallit Nunaannut allamut eqqunneqartut toqunneqassapput. Kinaluunniit nunap immikkoortuanut qimmimik qimuttumik eqqussisoqarsimasinnaaneranik pasitsaassaartoq kommunalbestyrelsi imaluunniit Uumasut nakorsaqaarnikkut oqartussaaffik attavigissavaa suliami oqartussat pineqaatissiisinnaanerata siunertaralugu.

§ 4. Qimminik qimuttunik qimuttoqarfimmi kommunimit kommunimut allamut nuunnermi piginnittup kommunimit nuuffimminit aamma nuuffimminut nalunaarutigissavai. Tamanna aamma qimminik qimuttunik illoqarfimmut nunaqarfimmulluunniit allamut kommuneqarfigisap iluani nuussinermi atuuppoq. Nuussineq ima paasineqassaaq qimmit qimuttut nalinginnaasumit sumiiffiannit allamut atajuartussamik nuussineq imaluunniit sivisunerusumik ullorpassuarni nuussineq. Tamanna nuussinnginnermi kingusinnerpaamik ullunik 14-inik sioqqutsilluni nalunaarutigissavaa.

Imm. 2. Nalunaarnermi ilaatinneqassapput qimmit qimuttut amerlassusaat, qanga akiuussutissamik kapitissimanersut kiisalu ID-mik nalunaaqutserneqarneranni normui.

Imm. 3. Qimmit qimuttut ID-mik nalunaaqutserneqarsimanngippata akiussuserneqarsimanngippataluunniit imaluunniit nappaatinik siaruarterinissamut nappaateqartoqalernissaanilluunniit aarlerinaateqarpata kommunalbestyrelsit nuussinissaq inerteqqutigisinnaavaat.

Imm. 4. Qimmit qimuttut nappaalasoqarfioreersunut tuniluuffioreersunulluunniit nuunnissaat inerteqqutaavoq.

Imm. 5. Imm. 1 aamma 2 naapertornagit qimminik qimuttunik nuutsisoqarsimappat kommunalbestyrelse peqqusisinnaavoq qimmit qimuttut illoqarfimmit nunaqarfimmilluunniit nuunneqassasut imaluunniit kommunalbestyrelsip innersuussaanut immikkoortinneqarallarlutik inissinneqassasut qimmit qimuttut nuuttut akiuussuserneqarsimani, ID-mi ilisarnaateqarneri kialluunniit piginerai pillugit nalornisoqarpat. Qimminik qimuttunik nuussinermi aningaasartuutit qimminik qimuttuutillip akilissavai.

Imm. 6. Qimmit qimuttut akiuussusersuineranut pilersaarut inatsisitigut pisussaaffiusoq malinnngippassuk tamatuma malinneqarnissaa kommunalbestyrelsip qulakkiissavaa.

Imm. 7. Qimmit qimuttut angallanneqarneranni qimuttoqarfiunngitsunut aqqusaaqqaartussanut tunngatillugu Uumasut nakorsaqaarnikkut oqartussaaffik tamatumunnga immikkut akuersissuteqaqqaartassaaq.

§ 5. Qimmeq qimuttoqarfimmiittoq qimuttoqarfiulluunniit avataaniittoq kalaallit qimmerineraat qimuttuunersoq nalornissutigineqalerpat qimmimik piginnittup pisussaaffigaa qimmeq kalaallit qimmerineraat imaluunniit qimmerinnginneraat pillugu uppernarsassallugu.

Imm. 2. Piffissami qimmip sumingaanneernerata aalajangernissaata tungaanut Uumasut nakorsaqarnikkut oqartussaaffik qimmip allanit immikkoortinnissaanut pisinnaatitaavoq. Qimmit allat avataannut tikinneqarsinnaajunnaarlugit inissiineq aamma tassaasinnaavoq akuutissat atorlugit kinguaassiortitsisinnaajunnaarneq allatulluunniit pisariaqartunik iliuseqarneq qimminik akuukkanik piaqqiorneq nappaatinilluunniit tuniluutsitsinerit pinaveersaartinniarlugit.

Imm. 3. Qimmeq kalaallit qimmerineraat qimuttoq pillugu uppersartaatit suut atorneqarsinnaanersut kiisalu kia tamatumunnga aningaasartuutit akilissanerai pillugit Naalakkersuisut ersarinnerusunik malittarisassiorsinnaapput.

Imm. 4. Qimmip sumingaanneerera uppersarneqarsinnaangippat Uumasut nakorsaqarnikkut oqartussaaffik kommunalbestyrelse isumasioqatigereerlugu qimmeq kalaallit qimmerineraat qimuttoq inaarutaasumik aalajangiissaaq. Uumasut nakorsaqarnikkut oqartussaaffiup aalajangerpagu qimmeq kalaallit qimmeringikkaat qimuttoq toqunneqassaaq , qimuttunit qimmeqarfimmit illersorsinnaasumik piaartumik anninneqanngippat. Qimmimik qimuttumik nulusimanagera ilisimaneqarpat Uumasut nakorsaqarnikkut oqartussaaffiup sarliap piaraasa toqunneqarnissaat qulakkiissavaa. Angutiviaappat Uumasut nakorsaqarnikkut oqartussaaffik paasiniaassaaq ilimagineqarpat qimmiaqqat qimmip nuunneqarnerata kingorna ullut 70-it tikillugit nuunneqarnerata qaangiuppata tassanga piaqqiaasut. Paasiniaanermut tassunga aamma toqutsinermut aningaasartuutit piginnittumit akilerneqassapput.

Imm. 5. Qimmit immikkoortinnerinut akuutissallu atorlugit piaqqiorsinnaajunnaarsinneqarnerannut allatulluunniit iliuseqarnernut tunngasunik aningaasartuutit kiap akilissanerai pillugit Naalakkersuisut ersarinnerusunik malittarisassiorsinnaapput.

§ 6. §§-it 4 aamma 5 naapertorlugit Uumasut nakorsaqarnikkut oqartussaaffiup inuit qimminik toqutsisinnaasutut naleqqutsinneqartut qimminik toqutsisinneqarsinnaapput utertitsinnaallutilluunniit. Suliamiit suliamut nalilersuilluni pisinnaatitsisoqartassaaq suliamullu tassunga atatillugu aningaasartuutit piginnittumik akilerneqassapput.

Kapitali 3

Qimuttunik qimmeqarneq

§ 7. Meeqqat 18 inorlugit ukiullit taamaallaat qimuttunik qimmeqarsinnaapput angajoqqaatik paarsisutilluunniit nakkutilliisoralugit akisussaasoralugillu.

§ 8. Kialluunniit uumasuuteqartup taakku peqqissaartumik paarineqarnissaat, taamatuttaaq nerukkarneqartarnissaat isumagissavaa, kiisalu imertinneqartarnissaat aamma timimikkut, pissusilersornermikkut peqqinnissamikkullu pisariaqartitaat eqqarsaatigalugit periaatsit akuerisaasut aamma ilisimatuussutsikkut misilittakkat naapertorlugit paarineqarnissaat uumasut illersornissaat pillugu Inatsisartut inatsisaat malillugu isumagissavai.

Imm. 2. Imm. 1-imi taaneqartut saniatigut qimmit qimuttut:

- 1) panertumik nallavissaqartinneqassapput kiisalu anorimut, silamut seqinermullu assiaquserneqassallutik,
- 2) minnerpaamik ullormut ataasiarluni takusarneqartassallutik,
- 3) ullormut ikinnerpaamik ataasiarlugit nerukkartarlugit, sapaatilli akunnerata ataatsip iluani ullormi ataatsimi nerisinnikkallarsinnaallugit,
- 4) imeqartinneqarluniluunniit apummik ipiitsumik peqartinniarneqassaaq, aamma
- 5) sapinngisamik ataatsimoortinneqassallutik qimmit qimuttut minnerpaamik marluugaangata.

Imm. 3. Arnavissat ilummisut milutsitsisullu qimmit inaannik peqartinneqassapput. Ima pitunneqassapput qimmit sarliartut piaraalu qimmit inaannut ajornaquteqanngitsumik isersinnaassallutik. Qimmit inaat ima ilusilerneqarsimassapput, arnaviaq akornutissaqanngitsumik iluani illuanut saassinnaassalluni angissusaalu arnavissap piaqqani tamaasa ilagalugit iluaniissinnaassalluni. Qimmit inaat ima ilusilerneqassaaq silamut illersuutaassalluni.

Imm. 4. Qimmit qimuttut piaraat arnaminiitinneqassapput sapaatit akunneri ikinnerpaanik arfineq-pingatsiinissaata tungaannut, arnaa toqusimanngippat, arnaallu toqusimappat qimmiaqqat sapaatit akunnerinik arfinillit inorlugit utoqqaassuseqarpata toqunneqassapput. Arnaat napparsimalerpat toquppalluunniit qimmiaqqallu sulii sapaatit akunneri arfinilinnik utoqqaatigalutik arfineq-pingasulli sulii angusimanagit qimmiaqqat arnaqaratik timikkut tarnikkullu nukittunersut kiisalu uumaannarsinnaaneri pillugit piginnittoq Uumasunik nakorsaqaqarnermik oqartussaasut isumasioreerlugu naliliissaaq. Uumasut nakorsaqaqarnikkut oqartussaaffik inaarutaasumik aalajangiissaaq.

§ 9. Qimmit qimuttut sisamanik qaammateqalereersimasut kalunnernik pitussimassapput, mattusimaneqarlutik, ungaluukkani mattusimaneqarlutik imaluunniit pituutaqartinneqassallutik, taamaattoq imm. 3 aamma 4 takukkit.

Imm. 2. Qimmiliviit ungalusat ima angitigissapput qimmit qimuttut ilaatigullu qimmiaqqat ajornaquteqanngitsumik aalanissaminnut inissaqarlutik ajornaquteqanngitsumillu nallarsinnaallutik. Qimmiliviit ungalusat qajannaallutillu qimmiaqqanut ajoqusiisinnaasunik aarlerinartoqassanngillat.

Imm. 3. Qimmit qimuttut piginnittuat nakkutilliisoralugu illoqarfiup nunaqarfiulluunniit avataani piniarnermi sunngiffimmiluunniit sammisaqarnermi pituussaarsimaneqarsinnaapput.

Imm. 4. Qimmit qimuttut piaraat sisamat arfinillillu akornanni utoqqaassusillit piginnittuat nakkutilliisoralugu qimminut inissiivinni pituussaarsimaneqarsinnaapput.

Imm. 5. Qimmit qimuttut qaammatinik arfinilinnit utoqqaanerit qimmilivimmi piginnitsiminnik nakkutigineqarlutik sivikitsumik pituussaaqqatinneqarsinnaapput.

§ 10. Qimmit qimuttut pitutat minnerpaamik 3 meterit tikillugit aalaffissaqartinneqassapput. Qimmit qimuttut aalasinnaassapput akornutitaqanngitsumillu nallarsinnaassallutik.

Imm. 2. Kalunnerit pituutarineqartut siunertamut naapertuuttumik sananeqaateqassapput minnerpaamik ataatsimik ajunngitsumik qissaruteqarlutik qimmimullu qimuttumut ajoqusiissanatik iluaalliortitsissanatilluunniit.

Imm. 3. Qimmit qimuttut marluutillugit pituttarineqarniarpata aappaata pituutaa minnerpaamik 1 meterimik takinerussaaq.

Imm. 4. Qimmit pitoqqasut akornat pituutaq siaaqqatillugu imminnut minnerpaamik 1 meterimik ungasitsigissapput.

Imm. 5. Qimusserluni angalanerni, piniariarnerni assigisaanilu qimmit qimuttut angalanermi kalunneqartinneqassapput. Angalanermi kalunnerit ima ilusiligaassapput qimmit qimuttut ataasiakkaarlutik tamarmik akornuteqanngitsumik aalasinnaallutik, nallarsinnaallutik kiisalu qimminit qimuttunit allanit unqavarsinnaallutik. Angalanermi kalunnerit ilusiligaassapput qimminut qimuttunut ajoqusiisinaanatik.

§ 11. Nigavillugit qungasequtit, qungasequtit innaallagissamoortut qungasequtilluunniit allat qimmimut anniaataasinnaasut iluaallortitsisinnaasulluunniit inerteqqutaapput.

Imm. 2. Qungasequt minnerpaamik 2 cm-inik silitsigissaaq.

§ 12. Qimmit qimuttut pituussaartut piginnittuata piaartumik tiguniartussaavai.

Imm. 2. Qimminik qitsunnillu tigusinermi illersorneqarsinnaasumik pineqassapput pisariaqanngitsumillu naalliutsinneqassanatik, tak. § 8, imm. 1.

Imm. 3. Qimmit qimuttut pituussaarsimasut qaammatinillu sisamanik utoqqaanerit kommunalbestyrelsimit tiguneqartut sivikinnerpaamik nal. akunnerni 72-ini inuttassarsiuunneqassapput. Piginnittoq nal. akunnerni 72-ini nalunaarsimangippat kommunalbestyrelsip qimmeq Uumasut nakorsaqaarnikkut oqartussaaffik isumasioreerlugu allamut pigisussanngorlugu nalunaarsorsinnaavaa imaluunniit qimuttumik qimillip akiligassaanik piginnittumullu taarsiinertaqanngitsumik allanut navianartorsiortitsitippat toqutsissinnaavaa. Qimmit qimuttut pitunneqanngitsut angalaannartut allanut navianartorsiortitsisut piaartumik toqunneqassapput piginnittumut taarsiinertaqanngitsumik.

Imm. 4. Qimmip qimuttup inuttassarsiuunnerani tiguniarneqarneranut, tiguneqarnerani nerisaqartinneranut uninngatinneranullu aningaasartuutaasut piginnittumut kommunalbestyrelsip akiligassanngortissinnaavaa.

Imm. 5. Imm. 4 naapertorlugu aningaasartuutit akilerneqarnissaata tungaannut kommunalbestyrelsip qimmeq qimuttoq tiggummigallarsinnaavaa.

Imm. 6. Piginnittup imm. 3 naapertorlugu aningaasartuutit akilerumangippagat kommunalbestyrelsip pisortanut akiitsut pillugit malittarisassat atuuttut malillugit akiliisitsiniarsinnaavoq.

Imm. 7. Naalackersuisut tigusiniarneq inuttassarsiuussinerlu pillugit ersarinnerusunik malittarisassiorsinnaapput.

§ 13. Qimmit uumatillugit nuunnermi aallarnermiluunniit naammattumik nakkutilliisoqartinngit qimaannarneqarnissaat inerteqqutaavoq.

Imm. 2. Uumasut nakorsaqaarnikkut oqartussaaffiata kommunalbestyrelsillu qimmeq qimuttoq akunnerni 72-inik amerlanerni nakkutigineqarani qimanneqarsimasoq allanut naleqquttunut pigisassanngorlugu nalunaarsorsinnaavaat imaluunniit naleqquttunik inuttassaqaanngippat toqutsissinnaallugu.

Imm. 3. Imm. 1 naapertorlugu toqutsineq piginnittumit akilerneqassaaq tassungalu taarsiinertaqanngitsumik pissalluni.

§ 14. Qimminik qimuttunik toqutsiniartup sapinngisamik sukkasuumik anniartitsinertaqanngitsumillu toqunneqarnissaat qularnaassavaa.

Imm. 2. Ipititsinikkut, qimitsinikkut nivinngaankulluunniit toqutsineq inerteqqutaavoq.

Imm. 3. Naalackersuisut qimminik qimuttunik toqutsineq pillugu malittarisassiorsinnaapput.

§ 15. Kiisortunik qimuttunik qimmeqarnissaq inerteqqutaavoq. Qimmit qimuttut kiisortut tassaatinneqarput qimmit navianartumik pissusissamisuunngitsumik pissusillit imaluunniit naatsorsorneqarsinnaanngitsumik pissuseqartutut isigineqartut. Qimmip qimuttup kiisortuusutut nalilerniarneqarnerani kommunip Uumasut nakorsaqaarnikkut oqartussaaffiata isumasioqatigiillutik nalilersussavaat. Qimmeq qimuttoq kiisortutut nalileneqarpat toqunneqassaaq.

Imm. 2. Qimmeq qimuttoq allamut qimmimut inunnulluunniit sakkortuumik kiisisimasoq toqunneqassaaq. Sakkortuumik kiisisimanernut tunngasuni sulianik naliliiniarnermi kommunip Uumasut nakorsaqaarnikkut oqartussaaffiata akornanni isumasioqatigiittoqassaaq.

Imm. 3. Uumasut nakorsaqaarnikkut oqartussaaffia imm. 1 aamma 2 naapertorlugit inaarutaasumik aalajangiissaaq.

Imm. 4. Imm. 2 naapertorlugu piginnittoq akunnerit 24-t iluanni toqutsisimangippat piginnittumut akiligassanngorlugu piginnittumullu taarsiinertaqanngitsumik kommunalbestyrelsi qimmip qimuttup piaartumik toqunneqarnissaa pillugu sulissuteqassaaq.

Qimmiliviit aamma qeqertat qimmiliviusartut il.il.

§ 16. Kommunalbestyrelse qimmilivinnik innersuussisassaaq.

Imm. 2. Qimmiliviit qimminut qimuttunut naleqquttuussapput.

Imm. 3. Qimmiliviit panertuullutillu sapinngisamik toqqissumiillutik taamaalillutik qimmit qimuttut tamaani uninngasinnaallutillu akornutitaqanngitsumik nallarsinnaallutik, tak. § 8.

Imm. 4. Qimmiliviit qanittumi inuit najugaqarfiinut, suliffeqarfinnit imaluunniit pisortanut namminersorlutillu sullivinnut ingasattumik akornusersuutaassanngillat.

Imm. 5. Qimmilivimmi ersarissumik piginnittumut attavissaa pillugu paasissutissaqarnissaa qimminik qimuttunik piginnittup isumagissavaa kiisalu qimmilivimmi qimmit qassiuneri paasissutissat ilanngullugit takuneqarsinnaassalluni. Allagartaliisoqarsimangippat kommunalbestyrelsip qimminik piginnittoq qinnuigissavaa qimmilivimmi ullut 14-it qaangiutsinnagit allagartaleeqqullugu. Tamanna malinneqanngippat kommunalbestyrelsip sulissutigissavaa qimmilivimmi allagartaliisoqarnissaa. Kommunalbestyrelsip aningaasartuutit piginnittumut akiligassanngortissinnaavai.

Imm. 6. Piginnittoq qaqugukkulluunniit pisussaavoq qimmilivittut innersuunneqartut eqqiluisaartinnissaat torersuunissaallu qulakkiissallugit.

§ 17. Qeqertat qimmiliviit taamaallaat piffissami maajip aallaqqaataaniit septembarip 30-ianut atorneqarsinnaapput.

Imm. 2. Qeqertat qimmilivissatut kommunalbestyrelsimit innersuunneqarlutillu aqunneqassapput, atulinnginnerinili uumasut nakorsaqaarfiannit akuerineqaqqaassallutik. Kingusinnerpaamik inatsisip atuutilerneraniit qaammatit arfinillit.

Imm. 3. Qeqertat qimmiliviit qimminut qimuttunut naleqquttuussapput, tak. § 8.

Imm. 4. Qeqertaq qimmilivik qimmeqatigiinnik ataasiinnarnit qimmiliviusaaq.

Imm. 5. Qeqertami qimmilivimmi ersarissumik piginnittumut attavissaa pillugu paasissutissaqarnissaa kommunalbestyrelsip isumagissavaa kiisalu qeqertami qimmilivimmi qimmit qassiuneri paasissutissat ilanngullugit takuneqarsinnaassalluni.

Allagartaliisoqarsimangippat kommunalbestyrelsip qimminik piginnittoq qinnuigissavaa qeqertami qimmilivimmi ullut 14-it qaangiutsinnagit allagartaleeqqullugu. Tamanna malinneqangippat kommunalbestyrelsip sulissutigissavaa qeqertami qimmilivimmi allagartaliisoqarnissaa. Kommunalbestyrelsip aningaasartuutit piginnittumut akiligassanngortissinnaavai.

§ 18. Qimmit qitsuilluunniit ataatsimoorteqqusaanngillat sumiiffinni qimminut qitsunnullu avatangiisinulluunniit peqqissutsikkut aarlerinartorsiortitsisinnaasuni imaluunniit uumasunut taakkununga naleqqutinngitsunut sumiiffinnut ataatsimoorteqqusaanngillat.

Imm. 2. Naalackersuisut qimmit qimuttut ataatsimoortinnissaannut tunngasunik malittarisassiorsinnaapput, matumani akiuussutissaliinernut, atortorissaarutitut qimmillu qimuttut ataatsimoortinneqarneranni amerlanerpaanik qassiusinnaanerat pillugu piumasaqaatit ilanngullugit.

Kapitali 4

Qimuttunik qimmeqarneq pillugu ileqqoreqqusaliorneq

§ 19. Kommunalbestyrelse kommunimut qimmit qitsuillu pillugit ileqqoreqqusaliusaaq.

Imm. 2. Imm. 1-imi ileqqoreqqusani taaneqartumi makku pillugit malittarisassanik imaqassaaq:

1) Taaneqassapput

a) sumiiffinni erseqqinnerusumik taasani qimuttunik qimmeqarnerup inerteqqutaanera,

b) sumiiffiit ukiup ilaani imermik qarsunneqartartut taamaalinerani qimuttunik qimmiliviusanngitsut, aamma

c) qeqertat sorliit qimuttunik qimmilivittut atorneqarsinnaanersut, kiisalu qaqugukkut qimmit qeqertani inissinneqarsinnaanersut.

2) Taaneqassapput

a) qimuttunik qimmitaarnissamut qanoq akuersissummik pisoqarsinnaanersoq,

b) akuersissut inummut tunngatitaanersoq, imaluunniit allanut tunniunneqarsinnaanersoq, aamma

c) kommunalbestyrelsi innuttaasunik annertuumik qasseeriarlutilluuniit maleruaqqusanic unioqutitsisartunik itigartitsinissaminnut imminut periarfissaqartinnersoq.

- 3) Taaneqassapput qungasequtit, qimmit ilisarnaataat, aqqisa allassimaffii kiisalu piumasarineqartutut akiuussutissanik kapitissimanermut uppernarsaatit pillugit kommunalbestyrelsip piumasaqaatai.
- 4) Kommunimi qimminik qimuttunik akisussaasumik toqqaanermut aalajangersakkat, ass. qimminik nakkutilliisoq. Aalajangersakkatigut pineqartup piginnaatitaaffii pisinnaatitaaffiilu pillugit erseqqissarneqassapput.
- 5) Immikkoortoq ataaseq nunaminertanik qimmilivissanik atugassanngortitsisarnermut tunngasoq.
- 6) Makku pillugit aalajangersakkat
 - a) qimminut illuaqqiornissamut ungaluukkiornissamullu piumasaqaatit,
 - b) aqqusinernut, aqqusineeqqanut illunullu il.il. qaninnerpaaffissat,
 - c) qimmit atuarfinnut, paaqqinnittarfinnut, nerisasserivinnut assigisaannullu ajornanngippat ungasinnerpaaffissaanut pitunneqassasut,
 - d) ima pitunneqassasut, taamaalilluni illut iserfigeriaannanngorlugit qimmillu qimuttut allat illuinut 7,5 meterinit qaninnerussanatik, pineqartoq allakkatigut tunniussilluni akuersisimanngippat.
- 8) Makku pillugit aalajangersakkat
 - a) qimmiliviit ilusilersorneqarnissaat pillugit piumasaqaatit, tassunga ilanngullugit pituffilerfissanik qillerineq
 - b) piumasaqaatit qimmit qimuttut minnerpaamik 3 meteriusunik pituutserlugit illugiissitaarlutik pitussimassasut imaluunniit qimmeqatigut akornanni pituuttat siaarlugit minnerpaamik 1 meterinik takissuseqarnissaannik. Qimmip qimuttup ataatsip pituutaa minnerpaamik ataatsimik atuuttumik qissaruteqartinneqassaaq.
- 9) Makku pillugit aalajangersakkat,
 - a) qimmit ilummisut sarlialluunniit kiisalu qimmiaqqat inaat imaluunniit taamaattoqarpat ungaluukkat qanoq ilusilersorneqassanersut, aamma makku pillugit
 - b) arnavissat ilummisut sarliallu ima pitussimassasut ajornanngitsumik qimmit inaannut isersinnaanngorlutik.
- 10) Qimuttunik qimmeqarnerup ajoqutaaneri pillugit naammagittaalliuutit qanoq suliarinissaannut aalajangersakkat.

Imm. 3. Kommunalbestyrelse najukkami atukkat aallaavigalugit pissutsinut allanut tunngasunik aamma aalajangersaasinnaavoq aalajangersakkat taama ittut Inatsisartut inatsisaannut tassanngaluunniit aalajangersakkanut akerliunngippata.

Kapitali 5

Pilattaalluni passussineq katsorsaanerlu

§ 20. Qimminik qimuttunik pilattaanermik nakorsaasersuillunilu passussinerit uumasut nakorsaarfianit akuersisaasumik uumasut nakorsaannik taamatullu passussinissamik Naalakkersuisunit akuersissuteqartumit taamaallaat suliarineqarsinnaapput. Nakorsaatinik

katsorsaaneq ima paasineqassaaq nakorsaatiniq tamanik katsorsaaneq, akiuussusersuineq minillugu.

Imm. 2. Immikkoortoq 1-imit ilaatinneqanngillat nakorsaatit nakorsaatinilluunniit allanik atuilluni katsorsaanerit Naalakkersuisunit akuerisaasunit peqqinnissaqarfimmit sulisunut tunniunneqartut suliaritinneqartulluunniit Naalakkersuisunit akuerisaasumik uumasunit nakorsamit ilitsersuusioreernikkut, isumaqatigeereernikkut tunniussinissamilluunniit innersuussereernikkut.

Imm. 3. Qimmip qimuttup isikkuanik allannguisussanik passussinerit inertequtaapput.

Imm. 4. Atortulersorluni allatulluunniit iliorluni qimmit qimuttut kigutaannik ajoqusiinissaq inertequtaavoq.

§ 21. Kinaluunniit qimminik qimuttunik piginnittunut siunnersuerusuttoq, qimminik qimuttunik katsorsaaniissamat siunnersuerusuttoq, uumasut nakorsiartarfiannik ingerlatserusuttoq akiuussutissanillu kapuuillunilu sunnersuerusuttoq taamaaliornissaminut Uumasut nakorsaqarnikkut oqartussaaffiannit akuersissuteqassaaq.

Imm. 2. Imm. 1 naapertorlugu akuersissutit piumasaqaatitaqartinneqarsinnaapput Uumasut nakorsaqarnikkut oqartussaaffianut ingerlaavartumik nalunaaruteqartitsisarnikkut kiisalu nakorsaasersuinerimik, katsorsaanermik siunnersuinerimillu uumasut nakorsaqarfiannit maleqqusat malinneqarpata. Arlalinnik piumasaqaateqartoqarsinnaavoq, akuersissutip annertussusaa imaalu apeqqutaallutik.

Kapitali 6

ID-mik nalunaaqutsiinerit, nalunaarsuinerit akiuussusersuinerillu

§ 22. Qimmit qimuttut tamarmik kingusinnerpaamik qaammatinik sisamanik utoqqaassuseqalersimasut nuna tamakkerlugu uumasunut paasissutissaasivimmut nalunaarutigineqarsimassapput immikkullu atajuartussanik ID-mik nalunaaqutserlugit, taamaalilluni qimmeq qularnaatsumik suussusersineqarsinnaaniassammat kalaallillu qimuttumik qimmerineraat pillugu aallaavia aalajangerneqarsinnaaniassammat.

Imm. 2. Imm. 1 malillugu ID-nik nalunaaqutsersuinerit uumasut nakorsaattut ilinniarnikumit Naalakkersuisunillu akuerisaasumit imaluunniit qimminik nakkutilliisut Uumasut nakorsaqarnikkut oqartussaaffiannit kapuisinnaatitaasumit taamaallaat suliarineqarsinnaapput.

Imm. 3. Imm. 1 naapertorlugu piginnittoq ID-mik nalunaaqutsiinerimut akerliussagaluarpat qimmip qimuttup pinngitsaalillugu nalunaaqutserneqarnissaa pillugu kommunalbestyrelsip sulissutigisinnaavaa.

Imm. 4. Imm. 3 naapertorlugu pinngitsaaliilluni nalunaaqutsiisoqarsinnaanngippat kommunalbestyrelsip piaartumik sulissutigissavaa qimmeq qimuttoq piginnittup akiligaanik allamat pigineqartussanngorlugu imaluunniit toqutsinneqartussanngorlugu.

§ 23. Qimmimik qimuttup inuttaata qimmit nappaataannut, parvovirusimut perlerornermullu aalajangersimasumik akiuussuserneqartarnissaannut malillugu Uumasut

nakorsaqaarnikkut oqartussaaffiup pilersaarutaa malillugu akiuussusiisassaaq. Qimmeq ukiumi siullermi pingasoriarlugu akiuussutissamik kapineqassaaq, taassuma kingorna ukiut pingasukkaarlugit aamma akiuussutissamik kapeqqinneqartassalluni. Piginnittup aamma qimmimi allannguuteqarnerat kommunimut nalunaarutigissavaa kiisalu attaveqarnissamut paasissutissanik allannguisoqarmat aamma taanna ilanngullugu.

Imm. 2. Imm. 1 naapertorlugu akiuussusersuinerit taamaallaat Naalakkersuisut akuerisaannik uumasut nakorsaannit , uumasunut nakorsaqaarfimmit akuerisaasumit qimminut akiuussusersuisartumit imaluunniit Uumasut nakorsaqaarnikkut oqartussaaffiup pisinnaatitaanit qimminik nakkutilliisumit suliarineqarsinnaapput.

Imm. 3. Kommunalbestyrelsip nakkutigissavaa qimminut akiuussutissanik Uumasut nakorsaqaarnikkut oqartussaaffimmit akuerisaallutik kapuisinnaasut uumasulluunniit nakorsaat qimminilluunniit nakkutilliisut pisariaqartitat naapertorlugit amerlassuseqartussat kommunimi atorfinitsinnissaat.

Imm. 4. Uumasut nakorsaqaarnikkut oqartussaaffiup kommunini qimminik akiuussusersuisartut ilitsersorlugillu akuerisassavai kiisalu kommunalbestyrelsit innersuussineratigut kommunimi qimminik nakkutilliisut ilinniartillugit piginnaatitsissummik tunisarlugit.

Imm. 5. Qimmit qimuttut akiuussuserneqarsimasut iD-millu nalunaaqutserneqarsimasut pillugit qimminut paasissutissanik katersivimmu kommunalbestyrelsi nalunaarummik nassiussissaaq akiuussuseereernermi imaluunniit ID-mik nalunaaqutseereernermi kingorna kingusinnerpaamik qaammat ataaseq qaangiutsinnagu kiisalu qimmit qimuttut tamarmik ID-mik nalunaaqutsermanissaat akiuussusersuinissamullu pilersaarut naapertorlugu akiuussusersimanissaat nakkutigissallugu.

Imm. 6. Imm. 5 naapertorlugu nalunaarutiginninnerit pillugit Naalakkersuisut malittarisassiorsinnaapput, matumani ilaatigut kommunalbestyrelsip paasissutissat suut nalunaarutigissanerai kiisalu qanoq akulikitsigisumik nalunaaruteqartoqartarnersoq ilanngullugu.

Imm. 7. Akiuniarnissamut malittarisassat ersarinnerusut, taakkununga ilanngullugit akiuussusersuinerit akulikissusaat, akiuussutissanut assigiinngitsunut tunngasut pillugit piunasaqaatit kiisalu akiuussusersuinerit pillugit pilersaarutit Naalakkersuisut ersarinnerusunik malittarisassiorsinnaapput.

Imm. 8. Qimminik qimuttunik pisussaaffittut katsorsarnissaannut malittarisassanik, soorlu miluuffigisaminnit ilanngartuisunik peqqissaanermillu imaluunniit pitsaaliuinermik passussinerit allat pillugit Naalakkersuisut ersarinnerusunik malittarisassiorsinnaapput.

§ 24. Qimmip qimuttup inuttaataa inatsisit malillugit pisussaaffiusunik akiuussusersuinissaa akerlerippagu qimmip pinngitsaalillugu piginnittumut akiligassanngortillugu akiuussuserneqarnissaa pillugu kommunalbestyrelse suliniuteqassaaq.

Imm. 2. Imm. 1 naapertorlugu qimmit qimuttut pinngitsaaliissummik akiuussutissanik kaporneqarsinnaanngippata, nalunaaqutserneqarsinnaanngippata kiisalu nalunaarsorneqarsinnaanngippata kommunalbestyrelsip suliniutigissavaa piginnittup akiligaanik tigumminnimmullu taarsiinertaqanngitsumik qimmit toqunneqarnissaat.

§ 25. Qimmit qimuttut qimmit nappaataannut, parvovirusimut perlerornermullu akiuussutissamik Uumasut nakorsaqaarnikkut oqartussaaffiup akiuussusersuinissamut pilersaarutaanut naapertuuttumik kapitinnerannut kiisalu ID-mik nalunaaqutsersornerannut atatillugu aningaasartuutit Nunatta karsiata akilertassavai. Aningaasartuutini pineqarput atortussat, kapuutit akiuussutissallu, illoqarfinnulli nunaqarfinnullu nassiunneri pinnagit, taakkulu kommunalbestyrelsit namminneq akilertassavaat.

Imm. 2. §§ 22-mi aamma 23-mi aalajangersakkat avataatigut akiuussutissiinernut ID-millu nalunaaqutsiinernut aningaasartuutit kiisalu nappaatinut allanut imm. 1-imi eqqaaneqartut avataatigut akiuussutissanik kapuunerit allat Naalakkersuisut susassarinnigilaat.

Qimminik qimuttunik nakkutilliineq

§ 26. Qimminik qimuttunik Uumasut nakorsaqaarnikkut oqartussaaffimmi nakkutilliinermik aallartitsisinnaavoq qimmit nappaateqartutut ersiuteqarpata imaluunniit arlaannik peqqiilliuuteqarpata. Uumasut nakorsaqaarnikkut oqartussaaffik nakkutiginninnernut atatillugu misiligutissanik tigooqqaallunilu katersisinnaavoq, kiisalu immikkut nalunaaqutsersuilluni nalunaarsuillunilu uumasunik nakorsaannermik periaatsinik allanik suliaqarsinnaalluni.

Imm. 2. Qimminik piginnittoq Uumasut nakorsaqaarnikkut oqartussaaffimmut pisuni imm. 1-imi ittumi akeqanngitsumik pisariaqarnera naapertorlugu ikiutissaaq.

Nappaalasoqalernerani tuniluuttoqarneranilu iliuusissat

§ 27. Qimmit qimuttut akornanni nappaalasoqalerpata tuniluutsitsinaveersaarnermik pisariaqartunik suliniutinik kommunalbestyrelsit Uumasut nakorsaqaarnikkut oqartussaaffianit aallartitsinissamut peqquteqarsinnaapput.

Imm. 2. Nappaammik siaruarternissamut aarlerinaateqalersitsisoqassappat illoqarfiit nunaqarfiillu akornanni qimminik qimuttunik eqqussuineq annissuinerlu kiisalu qimusserneq Uumasut nakorsaqaarnikkut oqartussaaffiata inerteqqutigisinnaavaa.

Imm. 3. Uumasut nakorsaqaarnikkut oqartussaaffik uumasut nakorsarinngisai, qimminik akiuussusersuisuunngitsut qimminilluunniit nakkutilliisuunngitsut uumasunut nakorsaaneqarfimmit qimminik akiuussusersuisut qimminilluunniit nakkutilliisut taama iliornissaminut immikkut akuerisaasut nappaalasoqalernerani nappaatinilluunniit tuniluuttoqarnerani akiuussusersuisinnaapput.

Imm. 4. Imm. 1-imi suliniutinik aallartitsinermut attuumassuteqartunik aningaasartuutit kommunalbestyrelsimit akilerneqassapput.

§ 28. Qimmit nappaataannik parvovirusimillu annerusumik tuniluuttoqarluni nappaalasoqarnerani akiuussutissiineq annertusineqarsinnaavoq taamaallaat Uumasut nakorsaqaarnikkut oqartussaaffimmit innersuippata akuersippatalu. Kommunalborgbestyrelsi nappaalanermik tuniluuttumik pasitsaassaqarpat Uumasut nakorsaqaarnikkut oqartussaaffik piaartumik attavigissavaa.

Kapitali 7

Piaqqiortitsineq, qimmit sungiusaaviinik ingerlatsineq, niuerneq assartuinerlu

§ 29. Qimmit sungiusaaviinik, angerlarsimatitsisarfinnik, paaqqinnittarfinnik pilersitsineq, aaqqissuussineq ingerlatsinerlu taamaallaat Uumasunut Nakorsaaneqarfimmit akuersissuteqarnikkut pisinnaapput.

Imm. 2. Qimmit sungiusaaviinik ingerlatsinermut, piaqqiortitsinermut, allisaanermut, nipitartitsinermut kiisalu piaqqanik paarsinermut arnavissanillu ilummisunik paarsinermut paaqqtarinninnerlu pillugit Naalakkersuisut ersarinnerusunik malittarisassiorsinnaapput.

§ 30. Qimuttut piaraat sapaatit akunnerinik arfineq-pingasunik nukarliit tuneqqusaanngillat tunniuteqqusaanatilluunniit aatsaat arnaat ilanngullugu tuniniarneqarpat taamaaliortoqarsinnaalluni.

§ 31. Qimuttunik qimminik niuerneq pillugu Naalakkersuisut ersarinnerusunik malittarisassiorsinnaapput, matumani ilaallutik pisinermi tunisinermilu nalunaaruteqarneq nalunaarutiginninnerlu, peqqissusaannut tunngasunut piumasagaatit, misissuinerit, passussinerit, assartuinerit, uninngatinneqarneri assigisaannullu tunngasut.

§ 32. Qimminik qimuttunik assartuineq illersorneqarsinnaasumik qimmillu qimuttup isikkua, peqqissusaa tarnikkullu pisariaqartitaat isiginiarlugit assartuisoqartassalluni.

Imm. 2. Nalunaaquttap akunnerinik arfinilinnik sivisunerusumik angalasoqassatillugu qimmit qimuttut imermik imersinnaassapput.

Imm. 3. Naalakkersuisut qimminut qimuttuunngitsunut allanut qimuttoqarfikkullu aqqusaartunut tunngasunik malittarisassiorsinnaapput, matumanilu uninngatitsivinnut piumasagaatit kiisalu qimminik passussinernut il.il. kiisalu uppernarsaatinik ilanngussanut tunngasut eqqarsaatigalugit.

Kapitali 8

Qimminut qimuttunut napparsimmaviit il. il. pilersinneqarnerat, aaqqissuussaanagerat ingerlanneqarnerallu

§ 33. Qimminut qitsunnullu napparsimmaviit pequtsersornerat ingerlannerallu taamaallaat pisinnaavoq Uumasunut nakorsaaneqarfimmit akuersissummik peqaraanni.

Imm. 2. Imm. 1 naapertorlugu uumasunut napparsimmaviit initaanik il.il. aaqqissuussinernut Naalakkersuisut ersarinnerusunik malittarisassiorsinnaapput, matumani akuersissuteqarnissamut piumasagaatinut malittarisassat ilanngullugit.

Kapitali 9

Qimussimik sukkaniunneq il.il.

§ 34. Qimmit qimuttut ajoqutigisinnaasaannik pisariaqanngitsumillu eqqissiviillitutigisinnaasaannik imaluunniit artukkernissaannik aaqqissuussinerit unammisitsinerillu inerteqqutaapput. Taamatutaaq qimuttumik qimmerisamik taamaattunut peqataatitsinissaq inerteqqutaavoq.

§ 35. § 34-mi inerteqqummit ilaatinneqanngillat pisortatigoortumik qimussinik sukkaniunneq assigisaannilluunniit unamminerit.

Imm. 2. Qimussimik sukkaniunnermi imaluunniit unamminerni allani qimmit qimuttut peqataasut timimikkut sannaat iluamillu pineqarnissaat isiginiarlugit ingerlanneqassapput. Assingusumittaaq qimminut qimuttunut aammalu qimmit sukkaniunnernut unamminernulluunniit allanut peqataanissamut sungiusaanermut atuuppoq.

Imm. 3. Qimmit qimuttut sukkaniunnermi unamminermiluunniit allami peqataanerminni timikkut tarnikkullu pillarneqartassanngillat.

Imm. 4. Sukkaniunnermi unamminermiluunniit qimmit qimuttut illoqarfimmut, nunaqarfimmut kommunimulluunniit allanut nuuttariaqarnerannik pisariaqartumik, qimminik piginnittup § 4 malillugu kommunimit nuuffimmit akuersissummik peqqaassaaq nuuffiup qimmit qimuttut ID-mik ilisarnaataat akiuussusersimanerallu pillugit nakkutigineqarniassammata kiisalu sumiiffimmut nappaatinik eqqussuisoqarnissaata pitsaaliornissaa qulakkeerniarlugu.

§ 36. Qimmit qimuttut sukkaniunnermi peqataasut tamarmik:

- 1) perlerornermut, qimmit nappaataannut parvovirusimullu akiuussutissanik pilersaarummut naapertuuttumik qimmit qimuttut akiuussuserneqarsimassapput kiisalu piginnittup qimminut peqataasunut tamanut sukkaniunneq ullunik 14-inik sioqqullugu tunngaviumik akiuussuserneqarsimanerannut uppernarsaateqassallutik,
- 2) immikkut ID-mik nalunaaqutserneqarsimassapput atajuartussamik kiisalu nuna tamakkerlugu qimminut paasissutissani nalunaarsorneqarsimassallutik,
- 3) minnerpaamik 12-nik qaammateqalereersimassapput, aamma
- 4) sannaatigut sakiaatigullu tassunga tulluutissaq ilumminani milutsitsinaniluunniit.

§ 37. Sukkaniutsitsinermi unamminermiluunniit allani akisussaasut aaqqissuussinermut malittarisassiussapput. Malittarisassat Uumasunut nakorsaaneqarfimmit akuerineqassapput malittarisassallu minnerpaamik makkuninnga imaqaassallutik:

- 1) iperaattamik atuineq
- 2) qimminik pitunneqanngitsunik tigusiniaaneq,
- 3) qimmit peqataasut ID-mik nalunaaqutsersimanissaat, taamaaliornermi piginnittoq pisariitsumik kinaassusersineqarsinnaaniassammat,
- 4) piumasaqaatit pissutsillu aaqqissuussinermik unitsitsisariaqalersut allannortitsisariaqalersulluunniit, aamma
- 5) qimmit qaqugukkut pituisa kipinissaat, sukkaniunnerup unamminerulluunniit aallartinnerani qimmit qassiussanersut kiisalu apuunnermi qimmit qassit atorneqassanersut.

Imm. 2. Malittarisassat ilaqqullugit Uumasunut nakorsaaneqarfik aamma piumasqaateqarsinnaavoq.

§ 38. Qimmeq qimuttoq sukkaniunnermut unamminermulluunniit peqataasoq sukasaatissaannik tuneqqusaanngilaq, matumani uumasut nakorsaataannik, inuit nakorsaataannik, nerisaasa nakorsaatinik akuneqarnissaannik, allanilluunniit qimmip timimigut, qasujaassusaanut sungiusarnermi sukkaniunnermiluunniit iluaqutigisinnaasaanik tuneqqusaanani.

Imm. 2. Passussinerit nipaallisaatit siunertallit aamma nappaammik nalinginnaasumilluunniit sunniinermik kingunilimmik passussinerit pissanngillat piffissami sukkaniunnermi unamminermiluunniit allani pisinnaasaanik sunniisinnaasutut isigineqarsinnaasunik tunineqassanani.

Imm. 3. Uumasunut nakorsaatit sukkaniunnermi qimmimut qimuttunut taamaallaat tunniunneqarsinnaapput uumasut nakorsaata qimmimut qimuttumut aalajangersimasumut atilimmut unioqutitsinerunngitsumik tunniussimappagit.

Imm. 4. Piginnittup imm. 1-3-mut akerliusunik qimmimi qimuttut pineqannginnissaat qulakkiissallugu akisussaaffigai.

§ 39. Naalackersuisut sukasaatinik atuinermut nakkutilliinissamut malittarisassanik ersarinnerusunik aalajangersaasinnaapput, kiisalu sukkaniunnermi uumasunik nakkutilliinissamut misissuinissamullu tunngasut ilanngullugit.

§ 40. Nappaalasoqalenera imaluunniit nappaalasoqalernissaa aarlerinaateqarpat kiisalu qimmit qimuttut sukkaniunnermi peqataasunut peqqissusaannut pissutsit navianartorsiortitsippata Uumasunik nakorsaqaarnermi oqartussaasut qimminik qimuttunik sukkaniutsitsinissaq unitsissinnaavaa piffissamilu aalajangersakkami sumiiffimmi aalajangersimasumi qimminik qimuttunik sukkaniutsitsinissaq inertequtigisinnaallugu.

§ 41. Qimmeq qimuttoq sukkaniunnermi unammisitsinermiluunniit allami pituutaanit kipineqarsimappat piginnittuata akunnerit sisamat iluanni tigoreersimassavaa ajoqusersimappallu qimmeq passutsissallugu. Qimminik pituussaarsimasunik katersinerup illersorneqarsinnaasumik sukkasuumillu pinissaa qulakkiissallugu sukkaniunnermik unammisitsinermilluunniit aqutsisup pisussaaffigaa qimmillu qimuttut tigoorarneqartut ajoquserneqannginnissaat ilanngullugu eqqarsaatigalugu.

Imm. 2. Qimuttunik qimmillip nal. akunnerit sisamat iluanni qimmiminik tigusisimangippat qimmit qimuttut tiguneqarnissaat siunertaralugu kommunalbestyrelsi suliniuteqassaaq.

Imm. 3. Kommunalbestyrelsip tigusiniaqqusineratigut tigusineq piginnittumut akiligassanngortinneqarsinnaavoq.

§ 42. Qimminik paannitsitsisarneq inertequtaavoq taamatullu qimuttumik qimmerisamik taamaattunut peqataatitsisarneq inertequtaalluni.

Kapitali 10

Ilisimatusarneq qimmillu sannaannik passussineq

§ 43. Qimmit qimuttut anisuumik mannessanilluuniit tiguserit nuussinerillu taamaallaat pisinnaapput Uumasunut nakorsaaneqarfik immikkut akuersissuteqarpat.

Imm. 2. Kalaallit qimmii qimuttut anisuumik mannessanilluuniit nuutsivigineqarsinnaanerannut ilummissitsilersinnaanerannulluuniit tunngasunik Naalakkersuisut ersarinnerusunik malittarisassiorsinnaapput.

§ 44. Aalajangersakkami misiligutissanik, paasissutissanik kisitsisitigullu paasissutissanik katersisarnerit kiisalu qimminik qimuttunik nakkutilliinerit misiligaanerillu suulluuniit Uumasunik nakorsaqaarnermi oqartussaaffimmit akuerineqaqqaartarnissaat akuersissutigineqartassaaq.

Imm. 2. Imm. 1 naapertorlugu akuersissuteqartoqassapat misileraanerup suliarineqarnera pillugu paasissutissat katersorneqartut tamaasa pillugit Uumasunik nakorsaqaarnermi oqartussaaffik ilisimatinneqassaaq.

Imm. 3. Imm. 2 naapertorlugu ilisimatitsineq Uumasunik nakorsaqaarnermi oqartussaaffiup piunasaqaarneratigut pissaq kingusinnerpaamik misileraanerup naammassineqarneranit Uumasunullu nakorsaaneqarfiup piunasaqaarneratut isikkoqartinneqassalluni.

Imm. 4. Naalakkersuisut qimminik qimuttunik ilisimatusarnermut pinnguusaannillu passussinermut tunngasunik ersarinnerusunik malittarisassiorsinnaapput.

Kapitali 11

Nakkutilliineq, nalunaaruteqarneq uparuaanerlu

§ 45. Inatsisartut inatsisaanni matumani aalajangersakkat malinneqarnerisut Naalakkersuisut nakkutigissavaat.

§ 46. Kommunalbestyrelsip Inatsisartut inatsisaanni §§-it 3-4, § 5, imm. 1, §§ 7-18, §19, imm. 2, §§ 22-24, § 30, § 32, §§ 34-36 aamma §§ 41-42 nakkutigissavai §§-illu 3-15-ip, § 19, imm. 2, §§-ini 22-24, § 32-mi piunasaqaatit pisariaqartutut isigineqartut eqquutsinnissaannut qulakkeernissaat pillugit inerteqquteqassalluni aamma peqqussuteqassalluni.

Imm. 2: Kommunalbestyrelsip Uumasunut Nakorsaaneqarfik suliani Inatsisartut inatsisaanni uani § 5, imm. 4, § 12, imm. 3, § 13, imm. 2, § 15 aamma § 49, imm. 2 malillugu tunngasuni isumasiortassavaa kiisalu uumasuteqarnermut tunngasuni nalornileruni imaluuniit inatsit malillugu oqartussaasutut akisussaaffimminut tunngasuni nalornileruni.

Imm. 3. Kommunalbestyrelsip Uumasunut Nakorsaaneqarfik nalunaarfigissavaa kommunalbestyrelsip pissutsinik ilisimasaqaleruni oqartussaasut akuleruttariaqarnerannik tunngavissiisunik.

§ 47. Uumasunut Nakorsaaneqarfiup suliani uumasunik illersuiniarnermut uumasunullu tunngasunik suliaqarnermut ilisimasaqarnissamut pisariaqartuni pingaarnertut nakkutilliisuvoq, tak. § 3, imm. 3, § 5, imm. 2-4, §§ 20-21, § 23, imm. 4, §§ 26-29, § 33, §§ 37-38, § 40 aamma §§ 43-44.

Imm. 2. Kommunalbestyrelsip qinnutigineqarnerata kingorna Uumasunut nakorsaaneqarfiup nammineq najuussinnaanngikkaangamik aalajangigaanik suliaqartassallutik pisussaaffigai.

Imm. 3. Uumasunut Nakorsaaneqarfiup kinaassutsimik uppersaateqarluni eqqartuussivimmillu piginnaatitsissuteqaratik qaqugukkulluunniit pisortat namminersortullu illuutaannik, iniutaannik, angallataannik allagaataanillu takusaasinnaapput paasissutissanik Inatsisartut inatsisaat una inatsilluunniit naapertorlugu malittarisassiat tunngavigalugit aalajangiinissanut atugassanik pissarsiniarlutik.

Imm. 4. Uumasunut Nakorsaaneqarfiup piffissami killilikkami inuit naleqquttut isigineqartut piginnaatissinnaavai imm. 3 naapertorlugu paasissutissanik katersinissaannik.

§ 48. Kialuuniit qimmeq qimuttoq § 8, naapertorlugu illersorneqarsinnaanngitsumik pineqarsoriguniuk tamanna kommunalbestyrelsimut Uumasunulluunniit nakorsaaneqarfimmut ingerlaannaq nalunaarutigissavaa.

§ 49. Qimmit qimuttut illersorneqarsinnaanngitsumik pineqarpata akisussaasoq qimmip qimuttup pineqarnera pillugu kommunalbestyrelsimut iliuuseqarnissamik peqquneqarsinnaavoq.

Imm. 2. Qimmeq qimuttoq napparsimappat iluarsineqarsinnaanngitsumilluunniit ajoqusersimappat kommunalbestyrelse Uumasunut Nakorsaaneqarfik isumasioqatigereerlugu qimmip qimuttup toqunneqarnissaanik peqqusisinnaavoq uumaannassaguni naalliuppallaassappat.

Imm. 3. Peqqussut allaganngorlugu nalunaarutigineqassaaq. Kiisalu peqqussuteqartoqannginnerani qimmeq qimuttumut akisussaasuusooq oqaaseqarnissaminut periarfissaqartitaassaaq.

Imm. 4. Immeq qimuttup naalliukkunnaarsinneqarnissaa pissutigalugu imaluunniit akisussaasoq aallarsimasutut naatsorsuutigineqarpat pisariaqarnera naapertorlugu imm. 3 atortinngitsoorneqarsinnaavoq. Piginnittoq aallarsimasutut isigineqarpat qimmeq qimuttoq allamut naleqquttumut tunniunneqarsinnaavoq imaluunniit toqunneqarsinnaavoq.

Imm. 5. Imm. 2 naapertorlugu toqutsineq qimmeq qimuttup piginnittuanut taarsiinertaqanngitsumik pissaaq.

§ 50. Peqqussutit inerteqqutillu naammattumik piffissaliinikkut tunniunneqartassapput, taamaattoq akunnerit 72-it qaangernagit.

Imm. 2. Qimmip qimuttup naalliutsinnissaa pitsaaliorniarlugu pisariaqarnera naapertorlugu aarlerisaaruteqaaqaarnani peqqusisoqarsinnaallunilu inerteqquteqartoqarsinnaavoq.

§ 51. Qimuttumik qimillip § 46 naapertorlugu peqqussut inerteqqulluunniit malinngippagu kommunalbestyrelsip imaluunniit Uumasunik nakorsaqaarnermi

oqartussaaffiup qimmeq qimuttoq naleqquttumut nutaamut piginnittussamut nalunaarsorsinnaavaa tamanna uumasunut illersuiniarneq eqqarsaatigalugu illersorneqarsinnaappat. Tamanna pisinnaangippat kommunalbestyrelsip imaluunniit Uumasunik nakorsaqaarnermi oqartussaaffiup qimmeq qimuttoq piginnittumut akiligassanngorlugu toqutsissinnaavaat. Toqutsineq piginnittumut taarsiinertaqanngitsumik pissaaq qimmeq qimuttoq allanut navianartorsiortitsisimappat.

§ 52. Nalunaaruteqarneq, peqqussutit inerteqqutillu pillugit Naalackersuisut ersarinnerusumik malittarisassiorsinnaapput.

Kapitali 12

Naammagittaalliorneq

§ 53. Aalajangersakkami aalajangerneqarpoq Uumasunik nakorsaqaarnermi oqartussaaffik naammagittaalliuutinik suliaqartussaasoq pillugu, taamaattoq oqartussat taakku marluk isumasioqatigiillutik aalajangiigaat pinnagit. Aalajangiinerup naammagittaalliuutigineqartup tiguneranit sap.ak. sisamat ingerlanerini naammagittaalliummik tunniussisoqassaaq.

Kapitali 13

Pineqaatissiissutissatut iliuusissat

§ 54. §§-inik 3-4, §§ 7-15, § 20, §§ 22-24, § 29-30, §§ 32-33, § 35, § 38, § 42 §§ 43-44, § 49-mik unioqutitsineq pinerluttulerineq inatsimmi malittarisassat naaportorlugit pineqaatissiisoqarsinnaavoq.

Imm. 2. Pinerluttulerinermut Inatsimmi malittarisassiat malillugit akileeqqusissutitut ittumik pineqaatissiissutinik nassataqartitsisoqarsinnaavoq.

Imm. 3. Inatsisartut inatsisaanni uani § 3, imm. 1 aamma 2, § 8, § 9, imm. 1, § 13, imm. 1, §§ 14-15, § 20, § 22, imm. 1, § 23, imm. 1, § 42-mik Inatsisartulluunniit inatsisaat una naaportorlugu aalajangersakkanik sakkortuumik utikattumillu unioqutitsinerit qimminik qimuttunik qimmeqaqqusaajunnaarnermik qimuttunilluunniit qimminik passussisinnaajunnaarnermik pineqaatissiissutaasinnaavoq.

Imm. 4. Qimuttunik qimmeqarsinnaanerup imaluunniit qimuttunik qimminik suliaqarnissap inerteqqutigineqarnissaa pineqaatissiissutigineqarpat tamanna atajuartussatut imaluunniit sivikinnerpaamik ukiunut marlunnut pisinnaavoq. Inerteqqutinik taama itturnik unioqutitsinerit pinerluttulerinermi inatsimmi malittarisassat malillugit pineqaatissiinermik kinguneqarsinnaapput.

Imm. 5. Ingerlatseqatigiiffiit il.il. (inatsisilerinermi immikkoortut inuttut isigineqarsinnaasut) pinerluttulerineq pillugu inatsimmi kapitali 5 tunngavigalugu pinerluttulerineq pillugu inatsit tunngavigalugu akisussaatinneqarsinnaapput.

§ 55. Unioqutitsineq akiliisitsinermit qaffasinnerusumik kinguneqartinneqassanngitsoq isumaqarfigineqarpat, Naalackersuisut nalunaaruteqarsinnaapput, inuk pineqartoq

unioqqutitsinermi pisuusutut nassuerpat piffissaliunneqartullu ersarinnerusup ingerlanerani, sivitsuinissap qinnutiginerata kingorna, akiligassap nalunaarummi allanneqarsimasup akilernissanut piumassuseqarluni nassuerpat, suliaq eqqartuussivimmi suliarineqanngitsumik aalajangiiffigineqarsinnaasoq. Piumasaqartoqarpat nalunaarummi annertussusilikkamik akiligassiisummik akiliisitsisoqarnissaa piumasarineqarsinnaavoq. Taamatuttaaq Kalaallit Nunaanni eqqartuussisaaseq pillugu inatsimmi allakkap unnerluussutip imaanut, aammalu pasillerneqartup oqaaseqarnissamut pisussaaffeqannginneranut piumasaqaatit pillaaammik akiligassiinermut atuutissapput.

Imm. 2. Akiliisitsinerit Inatsisartut inatsisaat una taannaluunniit naapertorlugu malittarisassat aalajangersarneqartut naapertorlugit aalajangerneqartut Nunatta Karsiata pisassarissavai.

Kapitali 14

Atuutilersitsinermut ikaarsaarnermullu aalajangersakkat

§ 56. Inatsisartut inatsisaat una 1. juli 2022-mi atuutilerpoq.

Imm. 2. Kommunit qimmeqarneq pillugu ileqqoreqqusaat atuutiinnassapput Inatsisartut inatsisaat una malillugu qimuttunik qimmeqarneq pillugu ileqqoreqqusanik nutaanik taarserneqarnissaata tungaanut.

Namminersorlutik Oqartussat, ulloq xx xxx 2022

Naalackersuisut Siulittaasuat